



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,

Orthodoxorum Medicorum Patrono.

BIU Santé  
Médecine  
Paris

QUÆSTIO MEDICA,

QUODLIBETARIIS DISPUTATIONIBUS

*manè discutienda, in Scholis Medicorum, die Jovis vigesimâ-  
septimâ mensis Februarii, anno Domini M. DCC. LXXXIII.*

M<sup>o</sup>. PHILIPPO PETIT RADEL, Doctore Medico,  
Præside.

*An Chylosi promovendæ, Tritus?*

I.

**E**A est corporis humani fors & conditio, ut semper ad interitum ruat:  
Quibus legibus conservatur, iidem sensim labefactatur. Causæ sunt non  
solum materiæ ætheræ poros & liquores permeantis actio, sed & perpetui



solidarum sanguinisque & spirituum motus. Adde necessaria mentis & corporis munia, quæ dum corpus exercent, deterunt. Interim particularum per cutis poros perenniter effluentium, cæterarumque per varios ductus excernendarum jacturâ, perpetuum imminet animali œconomiae exitium. Hæc alimentis resarcienda venit. His contrâ mortem luctamur, aut saltem ei moras injicimus. Duplicis generis assumuntur, solida & liquida: ad ea assumenda duplici sensu, quasi totidem stimulis, fame nempe & siti impellimur. Ea autem neque per vasa distribui, neque ad nutriendum apta fieri poterunt, nisi prius in chylum convertantur.

## I I.

**C**HYLUS tenuis fluidaque substantia, magnæ elaborationis opus. In hunc transit alimentorum purissima & defœcatissima pars plurimorum liquorum mixturâ, multarumque partium tritu & actione subacta. Quanti momenti sit chyli confectio, vel ex hoc uno conjice; ab eo reparatur sanguis, fons uberrimus, undè promanant humorum elapsorum, & partium abrasarum supplementa; nempe gelatinosa portio, suum cuique humori, parti cuique succum idoneum promit & suppeditat. Sed quî humor solidas partes regenerat? In vasis perpetuo humorum nisu sensim elongatis attenuatisque vacuola relinquuntur. In hæc particulæ mole congruentes deferuntur, penetrant, applicantur. Jam minima quæque superficies undequaque intersitia tangit; sic nova corpuscula ad figuram meatuum se fingunt & accommodant, & cum iis firmâ conjunctione coalescentia incuneantur. Demùm ipsam partis nutriendæ naturam & formam induunt. Itâ quod prius erat fluidum in consistens corpus abit; & cum ipso solido unum efficitur. Quæris hic effectus undè pendeat potissimum? In promptu sunt tum cordis pulsus, tum arteriarum ictus & constrictiones. Adest vasorum omnium systolica vis, & continua particularum sese jugiter impellentium trudentiumque successio. His fluidorum cohæsiō cum solidis, atque indè in ipsa solida conversio promovetur. Itâ intelliges iisdem quæ peperere causis, detrimenta corporis non sine admirabili Creatoris providentiâ resarci.

## I I I.

**I**NTER officinas in quibus chylus elaboratur, nobilem locum obtinet ventriculus. In eo siquidè dissolvuntur alimenta. Quâ arte dissolvantur, interrogas? Motum ventriculi peristalticum attende. Hunc habet à musculosâ tunicâ, quæ fibris varii generis compingitur. Plurimæ à fibris juxta œsophagi longitudinem decurrentibus propagantur; quædam scilicet directè per superiora protensæ, quædam obliquè per hujus latera descendunt. Inter has, quæ per sinistram latus propagantur arcuum more fibras subjacentes interfecant. Præcipua autem fibrarum species circularium nomine insignitur, quod quasi totidem circuli ventriculum in orbem cingant & ambient. Hæ superficiem universam amplectuntur; circâ pylorum glomerantur densissimè. Motum ventriculi proprium juvant alia organa, ipsum & cæteras partes succi nutritii præparationi & distributioni inservientes alternis vicibus comprimantia. Diaphragma & abdominis musculos intellige, quorum ope perennibus intervallis subiguntur ac teruntur. alimenta. Sed quorsum, inquires, motus ventriculi: non aliâ arte diversas ciborum partes accuratius cum liquoribus in ventriculo contentis misceri, aut ab iis æquabiliter imbui conjicias. Sic aliquatenus aqua saponacea panni linei manibus vel palmulâ compressi intervalla subit, sordes ab iis deturbatura. Quin & attendas succi per



nervos affluentis copiam. Is fibras in motum adigit, liquoribus vim audit; hinc facilior esse solet digestio. Quid si aër in alimentis contentus vi sua elasticâ ad dividendas eorum partes inserviat? Quid si liquor gastricus ad emollienda, separanda, disjungenda, atque etiam incidenda alimenta comparatus esse videatur? His inchoatur feliciter in ventriculo chylosis, ipsius motu non parùm promota. Hic lenitèr contenta succutiens, & partitis vicibus modò hâc, modò illâc impellens, ea liquidis omni ex parte penetrandâ & dividenda objicit. Hujusmodi tritum (nec enim majori opus) in homine perutilem iudicat petita ex variâ ventriculi animantium fabricâ comparatio.

#### I V.

**Q**UÆ non ruminant ut equi, uno quidè m at valido illo & musculofo ventriculo gaudent. In ruminantibus multiplex tritûs apparatus. Quædam ut bos, ovis, quatuor ventriculis instruuntur. In primo seu magno ventre receptum aliquândiù pabulum, hujus postea fibrarum repetito succussu, concurrente motu diaphragmatis, in œsophagum remittitur. Hinc duplex fibrarum ordo in modum spiræ contorturum valdè contractilem efficit. Per eum rudiores boli ad os denuò mandendi, dentibusque contudendi validiùs, transmittuntur. Hinc salivæ copiâ quàm maximâ imbuti in reticulum decidunt, cujus interna superficies quasi cancellata, favi cellulas, sed irregulares exhibet. Earum parietes pabulo incidendo aptissimi, mordaci asperitate, quâ ferrarum dentes æmulantur. Deindè intrâ folia omasi tanquàm torcularis cujusdam compressum & attritum, potu per aquæductum advecto diluitur, & diutiùs asservatum reciproco delimatur apicum affricu. Postremò indè vi contractionis expulsum in abemasum effluit; ibi fibrarum blando motu agitur, & liquoris per glandulas affusi accessu perficitur. In avibus ventriculum carneum reperies. Hic quatuor constat musculis. Duo laterales valdè crassi, durâ & callosâ membranâ intùs operiuntur. Hi sese invicem comprimunt, ut si palmæ motibus perpetuis alternisque artè jungantur, distrahantur-vè. Sic conteruntur cerealia à liquido tum ex ore, tum ex bulbo glanduloso copiosius manante irrigata. Imo insectis quæ nemo spernat, qui benè noverit (nam vel in minimis & artificium & artificem suspicias) plures etiam obligèrè ventriculi. Exemplo sint talpa Impèrati & alia in quibus tres occurrunt. Piscium verò multorum fauces, palatum, dentium quâdam armaturâ, quorundam ventriculi eadem muniuntur. Quot in organorum varietate, tritûs instrumenta digestionì alloborant!

#### V.

**Q**UOD analogia ex variis animalibus desumpta suadet, id sola chyli in homine ad sanguinem via, seu potiùs partium huic famulantium actio abundè confirmat. Alimenta primùm in ore dentibus fracta & contrita, salivâ uberiore perfusa, linguæ motu circumacta & ad fauces propulsa, œsophagi compressivâ contractione in ventriculum delabuntur. Ibi à fibris muscularibus versantur, agitantur, premuntur, pinguntur, in eâ interim agente vividius ventriculi liquore. Observa pariter in intestinis vermicularem motum: hujus ope chylus cum variis liquidis, præsertim in duodeno, committitur. Insuper alternantibus & reciprocis respirationis motibus perpetuò subigitur. Lacteorum oscula in papillas intimæ intestinorum tunicæ hiantia, subit? (Eas in villorum familiâ ne reponas) tunc viarum angustis magis ac magis attenuatur. At quem



4

tritum in globosis mesenterii glandulis reperias? Imo ibi id millenas guttulas dividitur. Nec solum copiosis scaturientis inde lymphæ rivis dilui putes. Motricium præterea fibrarum elatere agitur, impellitur, acceleratur. Ubi autem ad lumbare receptaculum appulit (hujus figura ab animantibus in homine discrepat) fibrarum diaphragmatis inferiorum contractione pressus, verberatus, in canalē thoracicum repetitis truditur ictibus. Demum arteriæ magnæ cui incumbit, & ipsius quos præterlegit ramorum impulsionibus, quasi totidem oscillis, valvularum adminiculo sublevatus, tunditur magis ac conteritur.

*Ergò chylosi promovendæ, Tritus.*

## DOMINI DOCTORES DISPUTATURI.

- |  |  |   |
|--|--|---|
| M. Joseph, Ignat. <i>GUILLOTIN.</i>  | M. Joannes-Augustinus <i>COU-TAVOZ</i> , Chirurgia, latino idiomate Professor. | M. Benjaminus <i>LUCAS DE LAUREMBERT.</i>   |
| M. Carolus-Jacobus-Ludovicus <i>COQUEREAU</i> , Serenissimi Condæ Principis Medicus ordinarius, necnon Regis apud peditatum tum Gallicum tum extraneum Consiliarius Medicus. | M. Joannes-Baptista-Eugenia <i>DUMANGIN,</i>                                   | M. Ludovicus-Guillelmus <i>LE MONNIER</i> , Consiliarius Medicus Regis ordinarius Primarius, Regiarum Parisiensis, Londinensis ac Berolinensis Academiarum Socius, & in Horto Regio Botanicæ Professor ac Demonstrator. |
| M. Franc.-Maria <i>LEMOINE.</i>  | M. Thomas <i>LEVACHER DE LA FEUTRIE</i> , antiquæ Facultatis Decanus.          | M. Laurentius <i>FERRET</i> , Ecclesiæ Cameracensis Canonici.   |

Proponebat Parisiis JOANNES-JACOBUS-HIERONYMUS DUCOS, Nogarolensis, Saluberrimæ Facultatis Medicinæ Parisiensis Baccalaureus.

A. R. S. H. 1783. AB OCTAVA AD MERIDIEM.



Typis QUILLAU, Universitatis & Facultatis Medicinæ Typographi. 1783.